

## CHARTA DE VALORS DE L'ASSEMBLADA OCCITAN *occitan lemosin*

L'Assemblada Occitana es una associacion que vòu far liam entre los actors que trabalhan per avitar la vita occitana e mai vòu èsser un ostau comun per aqueu mond. Emper que vòu recaptar las valors que se pòdon exprimir dins aqueu teissut de vita puslèu qu'afortir las que li serián pròprias, l'Assemblada Occitana s'empara sus un sòcle minim de valors partejadas.

I - **Respècte de la persona umana.** L'Assemblada Occitana es pas compatible emb las ideologias que nègan lo prètz universau de la vita umana. Tota pensada, tot voler o tot fach de discriminacion, de negacion daus drechs umans, de racisme, de misoginia e d'omofobia non poirà gran dau tot èsser tolerats per l'Assemblada Occitana. Ja deuràn èsser extremats en defòra de l'associacion.

II - **Defensa de la libertat e de la democracia.** L'Assemblada Occitana es estachada de fons aus principis daus drechs collectius, a l'ideau democratic e a las libertats individualas e fundamentalas de la persona umana. Pas una entrava a aquelas valors serà tolerada dins l'associacion.

III - **Reconeissença d'una realitat occitana.** L'Assemblada Occitana es una associacion en lenga occitana per l'espelida de l'occitanitat (los trachs lingüistics, culturaus o politics que pertòchan l'occitan). Los que nègan o desconeiçon l'existéncia d'aquela occitanitat non trobaràn pas en l'Assemblada Occitana un ostau. E mai, emper que l'Assemblada Occitana recapta mai d'una concepcion de l'occitanitat, ela i vei un subjècte politic. E aquel engatjament politic es assumit per l'Assemblada Occitana.

IV - **Esperit de consens.** La pluralitat de sicaps e d'opinions, daus uns còps las brejas, son lo jòc normau d'un movement coma l'occitanisme e l'Assemblada Occitana o vòu pas negar. Totun, l'amira de l'Assemblada Occitana es d'ajudar au trabalh comun e a la convergència daus actors en favor de l'occitanitat. Per tant, es pas un luòc ont chalha agusar de las diferéncias d'opinions mas un luòc de recèrcha de consens. Non s'espèra pas que los actors qu'entran dins l'Assemblada Occitana sián d'acòrdi emb tot e emb tots los autres sòcis, sonque que respècten l'Assemblada Occitana coma eschassença de s'encontrar e d'aprestar daus projèctes comuns.

V - **Dobertura.** L'Assemblada Occitana vòu aculhir dau mond d'originas diferentas e daus uns còps tractar emb de las gents estrangieras a l'occitanisme. Tolerància intèrna e pedagogia extèrna, si que son de las valors nòstras.

VI - **Lo voler.** L'Assemblada Occitana vòu recaptar primier daus *actors* de l'occitanitat —mas se substituís pas a aquilhs actors— e espia vèrs l'accion. La fam d'obrar per la vita occitana es l'arsec que nos incita. Tot sòci de l'Assemblada Occitana participa aus enjòcs de societat segon las soás capacitats e promòu tostemps las valors de l'occitanisme.

VII - **Actitud.** Tot sòci de l'Assemblada Occitana se compòrta d'un biais respectuós e s'absten de tot acte immorau.

En signant aquesta charta, ieu sossignat/ada, \_\_\_\_\_  
(nom d'ostau, prenom) m'engatge a n'aplicar lo contengut. E sei conscient/a qu'en cas de non-respècte de la charta, me pòdon prepausar de las mesuras correctivas e pòde far l'objècte d'una exclusion de l'Assemblada Occitana.

Luòc:

Data:

Signatura: